

Serdana Memê Alan

Yasîn Hisên



Ev lîska şeytana ye...Memo
Pir nêzk mebe ha....agir li hemberî te ye...!
Û îro çarşeme... ew ji te re welîmê amade dikin, de
xwe ji xewna bedew re amade bike...ji ber li wir sê
Horî xwe bi selikê xwe liba dikin ên ku dagirtî ne ji
kaniyan...
amade be Memo....kezeba min. vaye ez bi bê çareyê
dava te vedidim...

Ji ber em neviyên wî tuxmî ne, em ji wan kesên me dûrî xewnan dixin
heznakin...û dûrî ba û dara...
Em ji dengên çûçik û bihna tiwa hezdikin,,û ji sitran û dastanên te jî hez
dikin.. ey nav şêrîno...Memo...
(Ey gulê sore keremke vir de were...
Vê sibehê ez bihna te dikim ji tixûbê Cizîra Botan)

Ez jî te distrênim...Memê min,,ey biyaniyê aniha...!
Ez şerê demê dikim...ey kirîvê delal
Û ji bejna te re du peyalên meya Efrînî hildidim,,bi te re li gundan
digerim, û te ji şevbuhêrkên bi gundî û dengbêjan re amade
dikim...Memê min,,ey hevalê biyaniyê..

daxwaza te bi (kirîvê) re dibînim...ew keça xwediya gulmitkên şekirînî û
şêrîn..ew kevoka gola (Simoqiya)...û ezim ew kewê xembar li ser kêla
te..

bi te re diçim bi tevaya dilê xwe ...û ji berbangê de, te dinoşînim bi
qehwa tal re , berî ku em berî bidin wan beyaran...!

Xwe dikim mîna (Zembîl Firoş), ji çavên (Xatûnê) ên zeytûnî, revyayî,, û
pêrgî te dibim di nava beytik û kevokan de....te tiwên bejî û Zatera çiyayî
dida Koviyan...û bi dengê (Mihemed Arif) re te bihn dikim...

Erê Memo...gundekî din,,û serdana me wê bi dawî bibe...
Sitranek din ji (Kawîs Axa),,û ezê bi te re dîn bibim
Du malikên din ji (Edûlê),,û ezê bi te re rêwî bim ji Kepezê Milan heta bi
Wêranşarê...

Awirek din ji (Eyşana Elî),,,a ku çil û çar kanî li ser sînga wê paldayî
ne,,û em ê bi hev re berî bidin mirinê...!

Ev e qedera me ,,Memê min...

Ku em ji heriya (Beko) bizên...û her salê em siwarê wê derewê bin...ey
padîşahê Hûrî û cinan,,ey xewkirê li ser palgeha êş û eleman...

Erê Memo...keziyên wê zêrînî..û lêvên wê li benda hezar ramûsana ye ji
me...û laşê wê kelehe ji gotinên qedexê ji me re...û ew bejna wê rêçikek
bû ji sawa fedyok re..